

frauen waren bei einander in ihres Vatern vnd Schwagers
 hause christlich, ehrlich vnd wol auffgezogen. Dieweil man
 nun an denselben so viel bemerkte, daß sie zum weltlichen
 stande zu leben keine sonderliche anmutung vnd lust hetten,
 sondern vielmehr geistlich zu werden vnd [zu] leben, auch
 Gott mit fasten vnd beten zu dienen, auch neben dem ein
 keusch vnd zuchtiges eingezogenes leben zu führen entschlossen,
 demnach hat der Jungfrauen Vater vnd Schwager zusamt
 seiner haußfrauen vff mittel vnd wege gedacht, vor die vier
 obgenandte Jungfrauen ein Oratorium vnd Closter in die
 ehre gottes vnd der heiligen, alle zeit reinen Jungfrauen
 Marien zu stifften vnd zu hawen. Vnd zu dero behueff den
 Ehr- vnd wirdigen herrn Henricum, den Probst des Closters
 Lamspringe, welcher vmb diese zeit bei menniglich vnd
 allenthalben in grossen ansehen war, zu sich beruffen, ihm
 sein christliches fürhabendes werck zu entdecken, auch sein rath-
 liches bedencken nebenst gutem vnterricht, wie ers damit fuglich
 vnd recht anfahen vnd vollenden möchte, anzuhören. Als
 nun jetztbemelter probst auff infoderen zu dem von Oedinge-
 roda kommen, sein gemut vnd meinung angehoret, hat er bei
 demselben, in dem fürhabenden christlichen werck bestendig vnd
 fremdig fortzufahren, gerathen vnd angehalten, aber den ort,
 wohin der von Oedingeroda das Oratorium vnd Closter
 zu setzen bedacht gewesen, trewlich vnd wolmeintlich wider-
 rathen.

Nach diesem hat sichs begeben, daß man in dem städtlein
 Eldagsen, welches des Graven von Hallermondts haupt-
 stadt war, festum dedicationis, die Kirmeß gehalten,
 worzu die Jundern von Wulffinghausen obbemelten Probst
 von Lamspringe auß sonderlicher gunst gefordert vnd geladen,
 vnd als der darauff sich eingestellet, ist er ehrlich vnd wol
 empfangen vnd angenommen worden. Vnter andern reden,
 die sie mit einander gehabt, hat der Probst dem von Wulffing-
 hausen, was der von Oedingeroda ihm für dieser zeit für-
 geschlagen, vermeldet vnd angezeigt, vnd wie er ihm den
 ort zu seinem furnemen ganz vndienstlich vnd zum Closter
 vngelegen widderrathen hat, als ist auß dem Arnold von